

REGLUR

um fjárhagsaðstoð félagsþjónustu Austur-Húnavatnssýslu.

I. KAFLI

Almenn ákvæði.

1. gr.

Hverjum manni er skylt að framfæra sjálfan sig, maka sinn og börn yngri en 18 ára. Þeim sem nýtir aðstoðar samkvæmt reglum þessum ber að taka hverri þeirri atvinnu sem býðst nema veikindi, örorka, aldur eða aðrar gildar vottfestar ástæður hamli því.

2. gr.

Fjárhagsaðstoð skal veita í eftirtöldum tilvikum eftir því sem nánar er kveðið á um í reglum þessum:

1. Til einstaklinga og fjölskyldna sem hafa ónógar tekjur sér til framfærslu og geta ekki séð sér og sínum farborða, sbr. lög um félagsþjónustu sveitarfélaga.
2. Þar sem um er að ræða fjárhagsaðstoð með það að markmiði að koma í veg fyrir að einstaklingar eða fjölskyldur komist í þá aðstöðu að geta ekki framfleytt sér. Aðstoð þessa skal að öllu jöfnu veita sem lán og ætíð í tengslum við fjárhagsráðgjöf.
3. Þegar um er að ræða fjárhagsaðstoð sem lið í endurhæfingu og stuðning til sjálfsbjargar, enda ekki í verkahring annarra að veita hana.

Kanna skal til þrautar möguleika á annarri aðstoð en fjárhagsaðstoð og henni aðeins beitt í eðlilegum tengslum við önnur úrræði, s.s. ráðgjöf og leiðbeiningar.

3. gr.

Fjárhagsaðstoð er ýmist í formi styrkja eða lána. Fjárhagsaðstoð skal veitt sem lán nema könnun á aðstæðum umsækjanda leiði í ljós að hann muni ekki vera fær um að endurgreiða hana. Heimilt er að taka vexti af lánum, þó aldrei hærri en meðalútlánsvexti lánastofnana á hverjum tíma.

4. gr.

Fjárhagsaðstoð, veitt á grundvelli rangra eða villandi upplýsinga af hendi skjólstæðings, er ávallt endurkræf. Máli er varðar visvitandi ranga upplýsingagjöf af hálfu skjólstæðings skal að öllu jöfnu vísað til lögreglu.

Telji starfsmaður dvöl skjólstæðings í eða utan sveitarfélags ekki samræmast ákvæði lögheimilislaga nr. 21/1990 skal tekin ákvörðun, í samráði við viðkomandi sveitarfélag, um það hvort málið verði sent Hagstofu Íslands til athugunnar.

5. gr.

Réttur til fjárhagsaðstoðar skapast í þeim mánuði sem sótt er um aðstoð. Fjárhagsaðstoð er að öllu jöfnu ekki greidd aftur í tímann, jafnvel þó umsækjandi hafi átt rétt á aðstoð en ekki leitað hennar. Félagsmálaráði Austur-Húnavatnssýslu er þó í undantekningartilfellum heimilt, vegna sérstakra aðstæðna umsækjanda, að greiða aðstoð aftur í tímann, þó ekki lengra en sem nemur fjórum mánuðum frá því að umsókn var móttækin.

Börn 18 ára og yngri eiga ekki rétt á fjárhagsaðstoð í eigin nafni.

6. gr.

Beiðni um fjárhagsaðstoð skal hafa borist eigi síðar en 25. hvers mánaðar, sé hún samþykkt er hún að öllu jöfnu greidd út 1. virka dag næsta mánaðar á eftir.

Sé sú krafa gerð til umsækjenda að ná í staðfestingu á samþykki fjárhagsaðstoðar og það ekki gert innan fjögurra vikna frá því hún er samþykkt er litið svo á að hennar þurfi ekki við og fellur hún því niður, nema sérstakar aðstæður umsækjanda komi til.

7. gr.

Öll fjárhagsaðstoð, vasapeningar sem og styrkir teljast til skattskyldra tekna.

II. KAFLI

Umsókn um fjárhagsaðstoð og undirbúningur mála.

8. gr.

Sækja skal um fjárhagsaðstoð á skrifstofu félagsþjónustu Austur-Húnavatnssýslu. Við mat á beiðnum um fjárhagsaðstoð skulu ætíð liggja fyrir eftirfarandi gögn með upplýsingum um umsækjanda og maka eða sambúðaraðila, enda eru þeir jafnframt skilgreindir sem umsækjendur:

1. Umsókn á þar til gerðu eyðublaði undirrituð af umsækjendum. Þar komi m.a. fram upplýsingar um fjölskyldustærð, tekjur, eignir, skuldir, atvinnu, húsnæðisaðstæður, lögheimili (sbr. lög nr. 21/1990 um lögheimili), ríkisfang og dvalarstað. Ef umsækjandi er ófær um að undirrita umsókn, skal umsóknin undirrituð af talsmanni hans. Einnig þarf bankareikningsnúmer og viðskiptabanki umsækjanda að koma fram á umsókninni.
2. Upplýsingar um bætur frá Tryggingastofnun ríkisins, afrit af launaseðlum síðustu þriggja mánaða, reiknað endurgjald, greiðslur frá lífeyrissjóðum, atvinnuleysistryggingum eða öðrum aðilum. Einnig upplýsingar um húsaleigubætur, staðfest afrit af skattframtali ásamt fylgigögnum þ.m.t. allar upplýsingar um eigin atvinnurekstur, landbúnaðarframtal og/eða búrekstrarreikning ef við á. Upplýsingar um lánamöguleika.
3. Atvinnulaus umsækjandi skal framvísa dagpeningavottorði eða staðfestingu á vikulegum mætingum frá atvinnumiðlun en læknisvottorði ef um sjúkradagpeninga er að ræða.
4. Umsækjanda er skylt að skila sjálfur inn þeim gögnum sem með umsókn skulu fylgja og tiltekin eru hér að ofan. Ekki er unnt að afgreiða umsókn nema tilskilin gögn liggja fyrir.
5. Rökstudd tillaga starfsmanns um afgreiðslu málsins, þar sem gerð er grein fyrir hvort forsendur séu fyrir og markmiðum með fjárhagsaðstoð.

III. KAFLI

Framfærslukostnaður og mat á fjárbörf.

9. gr.

Við afgreiðslu fjárhagsaðstoðar skal ganga út frá fjárbörf viðkomandi sem er mismunur framfærslukostnaðar og tekna og/eða bóta viðkomandi. Við mat á upphæð framfærslukostnaðar skal hliðsjón höfð af framfærslugrunni sem miðaður er við lífeyrisgreiðslur Tryggingastofnunar ríkisins, sbr. 21. grein. Við ákvörðun grunnfjárhæðar eru hafðar til hliðsjónar greiðslur almannatrygginga á hverjum tíma, sem nema samanlagðri mánaðargreiðslu örorkulífeyris, tekjutryggingar örorkulífeyrisþega og heimilisuppbótar. Utan framfærslukostnaðar eru ákveðnir útgjaldaliðir og skal tekið tillit til þeirra í hverju einstöku tilviki.

10. gr.

Til grundvallar greiðslu fjárhagsaðstoðar skal leggja framfærslukostnað og önnur viðurkennd útgjöld eftir því sem við á og heimilað er í hverju einstöku tilviki.

I. Framfærslukostnaður. Eftirtaldir þættir falla m.a. innan framfærslukostnaðar miðað við mánaðargreiðslur og á útreiknaður framfærslukostnaður að standa undir þessum útgjöldum:

- A. Matur og drykkjarvörur.
- B. Fatnaður.
- C. Heimilisbúnaður.
- D. Hreinlætis- og snyrtivörur.
- E. Lyf og læknishjálp.
- F. Afnotagjald síma og útvarps.
- G. Skemmtanir og lesefni.
- H. Fargjöld almenningsvagna.
- I. Hiti og rafmagn.
- J. Húsnæðiskostnaður í leiguhúsnæði miðað við leiguhúsnæði sveitarfélags eða annar eðlilegur húsnæðiskostnaður.
- K. Dagvistarkostnaður barna á leikskólaaldri.

II. Önnur viðurkennd útgjöld, sem veita má aðstoð til í einstökum tilvikum.

Heimilt er að veita aðstoð vegna eftirtalinna liða að hluta eða öllu leyti:

- A. Vistunarkostnaður vegna barna sem dvelja utan heimilis. Mötuneytiskostnaður skóla skv. reikningi, en annar kostnaður t.a.m. vasapeninga skv. samþykki félagsmálaráðs.
- B. Vistgjöld og vasapeningar á sambýlum, áfangastöðum, meðferðarstofnun og hliðstæðum stofnunum að hámarki í 8 vikur eftir að dvöl á meðferðar- og sjúkrastofnun lýkur.
- C. Fermingarstyrkur, sem nemur 50% af grunnaðstoð einstaklings.
- D. Styrkur til vistmanna sem dvelja á heilbrigðisstofnun og hafa verið þar a.m.k. í 4 mánuði eða fyrirsjáanlegt er að dvölin verði löng. Ætíð skal liggja fyrir greinargerð frá viðkomandi stofnun og vissa fyrir að Tryggingastofnun ríkisins eða öðrum aðilum beri ekki að greiða umræddan kostnað.
Hámark á ári:

Fatnaður	45.000 kr.
Tannviðgerðir	50.000 kr.
Gleraugu	22.000 kr.
- E. Útfararkostnaður þegar eignir eru ekki til staðar og ættingjar geta ekki séð um greiðslu kostnaðar. Til hliðsjónar við ákvörðun vegna slíks styrks skal litið til meðalkostnaðar jarðarfarar á vegum Útfararstofu kirkjugarðanna. Styrkur þessi skal þó eigi vera hærri en sem nemur 230.000 kr.
- F. Lán eða styrkur til fyrirframgreiðslu húsaleigu að hámarki sem samsvarar tveggja mánaða húsaleigu, miðað við leiguhúsnæði sveitarfélags eða annar eðlilegur húsnæðiskostnaður.
- G. Húsbúnaðarstyrkur til einstaklinga og fjölskyldna að hámarki 70.000 kr.
- H. Áfallaaðstoð til fólks með tekjur undir viðmiðunarmörkum vegna skyndilegs missis búslóðar eða annars eignamissis t.a.m. vegna bruna, veikinda eða annarra áfalla að hámarki 150.000 kr.
- I. Fæðingarstyrkur til þeirra sem eru að eignast sitt fyrsta barn að hámarki 50.000 kr.
- J. Skólalstyrkur vegna barna í grunnskóla að hámarki kr. 10.000 á önn, sem greiðist í upphafi hvernar annar.

K. Styrkur eða lán vegna íþróttar eða tómstundastarfs barna.

L. Greiðsla sérfræðiaðstoðar fyrir fólk með tekjur undir viðmiðunarmörkum. Til greiðslu tannviðgerða að hámarki 50.000 kr. skv. reikningi. Vegna viðtala við geðlækna, sálfræðinga og félagsráðgjafa að hámarki 10 tímar samkvæmt reikningi.

Aðstoð samkvæmt ofangreindu er bundin við þá sem hafa tekjur undir viðmiðunarmörkum þegar umsókn er lögð fram, eða hafa átt rétt á fjárhagsaðstoð síðastliðna fjóra mánuði.

Hliðsjón skal höfð af hagsmunum barna innan fjölskyldu við ákvörðun lán- og styrkveitinga.

IV. KAFLI

Meðferð tekna og útreikningur fjárhagsaðstoðar.

11. gr.

Skili umsækjandi ekki inn skattkorti mun staðgreiðsla skatta verða dregin frá reiknaðri fjárhörf umsækjanda (sbr. 7. gr.) í samræmi við gildandi lög og reglur á hverjum tíma.

12. gr.

Tekjur þær sem tilgreindar eru í 13. grein, koma til frádráttar við ákvörðun um upphæð fjárhagsaðstoðar. Til frádráttar koma einnig stéttarfélagsgjöld og greiðslur til lífeyrissjóða. Ef umsækjandi á eign sem ekki er nauðsynleg vegna heilsu hans eða starfa, eða er augljóslega umfram efnahag hans og þarfir, skal miða við að sala fari fram áður en til fjárhagsaðstoðar til framfærslu kemur.

Ef við á skal leitast við að styðja umsækjanda við að skuldbreyta lánnum, áður en til fjárhagsaðstoðar kemur.

13. gr.

Nánar tilgreint reiknast eftirfarandi tekjur til frádráttar:

- Laun umsækjanda og annarra fjölskyldumeðlima. Til fjölskyldumeðlima teljast umsækjandi, maki umsækjanda og börn hans.
- Allar bætur frá Tryggingastofnun ríkisins, nema þær sem tilgreindar eru hér að neðan.
- Atvinnuleysisbætur.
- Fjármagnstekjur að frádregnum fjármagnsgjöldum.
- Leigutekjur að frádregnum rekstrarkostnaði vegna húsnæðis.
- Endurgreiðslur vegna ofgreidds skatts.
- Greiðslur úr lífeyrissjóðum.
- Þegar umsækjandi býr í foreldrahúsum, hjá ættingjum eða öðrum, skal meta framfærslukostnað með hliðsjón af sannanlegum útgjöldum. Þó skal framfærslukostnaður umsækjanda sem er barnlaus og býr í foreldrahúsum aldrei metinn hærrí en 50% af framfærslugrunni einstaklings.
- Hvers konar styrkir og hlunnindi.
- Skaðabætur hvers konar án tillits til uppruna t.a.m. vegna slyss eða dóms eða hvern hátt annan þær eru tilkomnar, að undanskyldum dánarbótum sbr. hér að neðan.

Undanþegið frádrætti:

- Umönnunarbætur.
- Styrkir Tryggingastofnunar ríkisins til bifreiða og hjálpartækjakaupa.
- Dánarbætur vegna slyss.

- Húsaleigu- og vaxtabætur.

14. gr.

Þegar umsækjandi býr í foreldrahúsum, hjá ættingjum eða öðrum sem ætla má að taki þátt í framfærslu viðkomandi með beinum eða óbeinum hætti, skal meta framfærslukostnað með hliðsjón af sannanlegum útgjöldum umsækjanda, enda sé í umsókn um fjárhagsaðstoð ekki tekið mið af öðrum en umsækjanda, maka hans og börnum.

15. gr.

Hafni umsækjandi vinnu eða námstilboði skal sá hinn sami eigi hljóta meira en sem nemur helmingi framfærslugrunns.

Ef umsækjandi getur ekki framvísað staðfestingu á mætingum til vinnumiðlunar og/eða vottorði án viðunandi skýringa á hann ekki rétt á fjárhagsaðstoð fyrir þann tíma sem um ræðir.

16. gr.

Fjárhagsaðstoð til umsækjenda sem eiga við áfengis- og/eða vímuefnavanda að etja skal að jafnaði miðast við greiðslu húsaleigu, matar- og vasapeninga. Greiða skal húsaleigu beint til leigusala.

Til að mæta öðrum kostnaði skulu umsækjendur fá sem svarar vasapeningum (sjá kafla V) og eru þeir greiddir út vikulega.

Hafi umsækjandi ekki náð tókum á áfengis- og/eða vímuefnavanda sínum eftir endurteknar meðferðir, er heimilt að skilyrða frekar greiðslur með þeim hætti sem helst þykir til þess fallinn að bæta úr vanda umsækjandans og tryggja lágmarkslífsviðurværi viðkomandi.

17. gr.

Heimilt er með ákvörðun félagsmálaráðs að veita einstaklingum undir 25 ára aldri námsaðstoð til náms í íslenskum framhaldsskólum:

- Til einstaklinga 18-24 ára, sem hafa ekki lokið grunnskóla eða framhaldsskóla vegna félagslegra erfðileika og metur félagsmálaráð fjárhagsstöðu umsækjenda.
- Til einstæðra foreldra 18-24 ára, sem ekki hafa lokið grunnskóla eða framhaldsskóla sem hafa haft undir 75% af framfærslugrunni skv. 21. grein síðastliðna 12 mánuði.
- Vegna ungmenna, 16 og 17 ára, er búa í foreldrahúsum og foreldrar þeirra hafa haft tekjur á eða undir framfærslugrunni skv. 21. grein a.m.k. undanfarna 12 mánuði. Skal sú aðstoð miða að því að greiða áætlaðan bókakostnað svo og skólagjöld einu sinni á vetri.

Miðað skal að því að námið leiði til þess að viðkomandi geti hafið nám síðar, sem er láns hæft hjá LÍN.

Sú aðstoð sem veitt er skal miða að því að greiða skólagjöld og áætlaðan bókakostnað, auk framfærslu þann tíma sem námið varir, þ.e. til fjárráða einstaklinga. Meðlag sem umsækjandi kann að fá reiknast honum til tekna.

Samþykktir varðandi námskostnað skulu teknar fyrir hverja önn, þannig að aðstoð greiðist áfram þegar umsækjandi sýnir eðlilega námsframvindu.

18. gr.

Atvinnurekendur og sjálfstætt starfandi einstaklingar sem hafa lægri mánaðartekjur, samkvæmt reiknuðu endurgjaldi á ársgrundvelli, en sem nemur grunnfjárhæð sem aðstoð miðast

við, eiga rétt á fjárhagsaðstoð. Skilyrði er að viðkomandi sé á skrá hjá Svæðismiðlun Norðurlands vestra og leiti eftir launuðu starfi.

Auk reiknaðs endurgjalds skal tekið tillit til tekna samkvæmt 13. grein og hreinna tekna af eigin atvinnurekstri skv. síðasta skattframtali.

Við mat á hreinum tekjum skal taka tillit til rekstrarliða sem ekki hafa áhrif á fjárhagsstöðu. Jafnframt skal lagt mat á rekstur yfirstandandi árs m.t.t. þess hvort orðið hafa breytingar á rekstrinum sem ætla má að leiði til annarrar niðurstöðu.

Heimilt er að hafna/fella niður fjárhagsaðstoð ef Svæðisvinnumiðlun Norðurlands vestra tekur viðkomandi af skrá þar sem ekki sé vilji til að taka þeim störfum sem í boði eru.

19. gr.

Við útreikning á fjárþörf heimilisins skal miða við að framfærslugrunnur fullorðins einstaklings jafngildi samanlögðum óskertum elli- og örorkulífeyri, tekjutryggingu örorkulífeyrisþega og óskertri heimilissuppbót, eins og þessar greiðslur eru ákvarðaðar af Tryggingastofnun ríkisins á hverjum tíma.

Einstaklingur á rétt á einföldum framfærslugrunni. Ef sambúðarfólk eða hjón sækja um fjárhagsaðstoð skal framfærslugrunnur margfaldaður með 1,6 til að ákvarða upphæð framfærslu.

20. gr.

Við útreikning á framfærslukostnaði og ráðstöfunarfé skal að jafnaði tekið mið af tekjum og gjöldum síðustu þriggja mánaða.

Greiðslum sem koma sjaldnar en mánaðarlega skal deilt niður á þá mánuði sem þær eru ætlaðar fyrir t.d. barnabætur.

21. gr.

Við útreikning á fjárhagsaðstoð skal koma fram annars vegar framfærslukostnaður ásamt öðrum gjöldum og hins vegar ráðstöfunarfé einstaklings eða fjölskyldu.

Fjárþörf ákvarðast af framfærslukostnaði að frádregnum tekjum, sbr 10. og 11. grein hér að framan.

V. KAFLI

Vasapeningar.

22. gr.

Vasapeningar skulu nema 10% af framfærslugrunni á viku til einstaklings sem dvelur í foreldrahúsum, heimavist, annarri sjálfstæðri búsetu og til einstaklinga sem félagsmálaráð samþykkir að veita vasapeninga, sbr. 17. grein.

Vasapeningar til einstaklings sem dvelur á meðferðar- eða sjúkrastofnun, sbr. II. B lið 10. greinar, skulu taka mið af sjúkradagpeningum Tryggingastofnunar ríkisins.

Vasapeningar til þeirra er falla undir 17. grein hér að ofan, taka mið af sjúkradagpeningum Tryggingastofnunar ríkisins á hverjum tíma.

Vasapeningar skulu að öllu jöfnu vera greiddir út vikulega.

VI. KAFLI

Ákvarðanataka um fjárhagsaðstoð, réttur til áfrýjunar.

23. gr.

Ákvörðun um fjárhagsaðstoð taka eftirtaldir:

- Félagsmálaráð

- Félagsmálastjóri

24. gr.

Félagsmálaráð fer með eftirtalin mál varðandi fjárhagsaðstoð:

- Setur heildarreglur um afgreiðslu fjárhagsaðstoðar til einstaklinga og fjölskyldna og hefur eftirlit með að farið sé eftir þeim.
- Fjallar um öll stefnumarkandi mál varðandi fjárhagsaðstoð.
- Fjallar um umsóknir umfram staðfestar hámarksupphæðir sem og ef um er að ræða undanþágur frá reglum þessum.
- Fjallar um umsóknir þar sem reglur þessar kveða á um slíkt.
- Fjallar um áfrýjanir.

25. gr.

Félagsmálastjóra er heimilt að ákvarða fjárhagsaðstoð í eftirfarandi tilvikum:

- Fjárhagsaðstoð skv. framfærslumati og rúmast innan heimilda.
- Skyndiaðstoð í allt að tvær vikur, eða þar til félagsmálaráð kemur saman. Veitt skyndiaðstoð skal ávallt koma til frádráttar þegar aðstoð er reiknuð skv. IV. kafla.
- Húsnæðis- og vistunarfyrirgreiðslu, í allt að eina viku, þegar um húsnæðisleysi er að ræða eða barni er hætta búin á heimili.

26. gr.

Almennt skal fjárhagsaðstoð samþykkt til eins mánaðar í senn. Heimilt er í sérstökum tilvikum að samþykkja fjárhagsaðstoð til lengri tíma þó aldrei lengur en 3 mánuði í senn.

27. gr.

Ákvarðanir félagsmálastjóra skulu lagðar fyrir félagsmálaráð til staðfestingar að jafnaði einu sinni í mánuði.

28. gr.

Ákvörðun félagsmálastjóra um synjun fjárhagsaðstoðar má skjóta til félagsmálaráðs Austur-Húnavatnssýslu. Ákvörðun félagsmálaráðs Austur-Húnavatnssýslu má skjóta til úrskurðarnefndar félagsþjónustu, Hafnarhúsinu v/Tryggvagötu, 101 Reykjavík.

Áfrýjun skal vera skrifleg og berast viðkomandi stjórnvaldi eigi síðar en fjórum vikum eftir að viðkomandi var kunnugt um ákvörðun.

VII. KAFLI

Breyting láns í styrk.

29. gr.

Ákveði félagsmálaráð að breyta láni til lánþega í styrk skal styrkuppþæð tilgreind jöfn eftirstöðvum lánsfjárhæðar. Þegar láni er breytt í styrk skal umsækjanda gerð grein fyrir að styrkurinn ber tekjuskatt skv. gildandi lögum á hverjum tíma.

VIII. KAFLI

Greiðsla fjárhagsaðstoðar, lána, styrkja, frágangur mála og eftirlit.

30. gr.

Launafulltrúi félagsþjónustunnar gengur frá greiðslum vegna fjárhagsaðstoðar, styrkja og lána samkvæmt greiðsluheimildum frá félagsmálaráði eða félagsmálastjóra.

31. gr.

Almenna reglan vegna greiðslu fjárhagsaðstoðar er sú að fjárhagsaðstoð skal lögð inn á bankareikning umsækjanda einu sinni í mánuði.

Vasapeningar eru að öllu jöfnu greiddir út vikulega.

Launafulltrúa er heimilt, í samráði við félagsmálastjóra, að hagræða greiðslu fjárhagsaðstoðar á þann veg að umsækjandi haldi húsnæði og lágmarkslífsviðurværi sé tryggt, sbr. 15. grein hér að ofan.

32. gr.

Lán kemur því aðeins til útborgunar að gengið hafi verið frá tryggingu í samræmi við samþykkt:

- Umboði í tryggingabótum, þegar það á við.
- Almenn skuldabréf, þegar ekki er um að ræða veðhæfa eign eða tryggingabætur.
- Veðskuldabréf þegar um er að ræða veðhæfa eign.
- Launafulltrúi félagsþjónustunnar hefur eftirlit með frágangi og tryggingu lána. Þá annast launafulltrúi innheimtu lána og sér um skjólstæðingabókhald.

33. gr.

Ætíð ber að kanna reikningsstöðu umsækjanda um lán áður en mál eru afgreidd. Ekki skal veita ný lán nema staðið hafi verið í skilum vegna eldri lána skv. greiðslufyrirkomulagi eða gerð grein fyrir greiðsludrætti á fullnægjandi hátt.

34. gr.

Félagsmálaráði er frjálst að breyta greiðsluskilmálum láns komi í ljós að lántaki er ekki fær um endurgreiðslu láns, einnig getur félagsmálaráð breytt láninu í styrk sbr. 24. grein hér að ofan.

35. gr.

Launafulltrúi tekur saman yfirlit yfir heildargreiðslur vegna fjárhagsaðstoðar mánaðarlega og skal það afhent félagsmálastjóra.

Gildistaka.

Reglur þessar voru samþykktar hjá stjórn félagsþjónustu Austur-Húnavatnssýslu þann 18. desember 2003 í samræmi við 21. grein laga um félagsþjónustu sveitafélaganna. Reglurnar öðlast þegar gildi.

Blönduósi, 25. október 2004.

Dagný Annasdóttir, félagsmálastjóri Austur-Húnavatnssýslu.